

Бобораҳим Машираб

Гул юзунгга банда бўлойин

Ғазаллар, мустазодлар, мураббаълар, мухаммаслар



Ғафур Ғулом номидаги нашриёт-матбаа ижодий уйи
Тошкент – 2016

УЎК 821.512.133–1

КБК 84(5Ў) 1

М 34

Машраб

Гул юзунгга банда бўлойин / Машраб. Тошкент: Ғафур Ғулом номидаги нашриёт-матбаа ижодий уйи, 2016. – 196 б.

Муҳтарам китобхон!

Мазкур тўпلامга Бобораҳим Машрабнинг энг сара асарлари киритилди. Ижодий йўли мураккаб бўлган бу шоирнинг газал, мустазод, мураббаъ, мухаммасларининг муштарак жиҳати шундаки, уларда, аввало, инсон улугланади, унинг меҳр-муҳаббати, эътиқоди, иймони ва эзгу ишлари куйланади.

Китоб қалб жавонингизни безашига тилақдошмиз.

УЎК 821.512.133–1

КБК 84(5Ў) 1

ISBN 978-9943-03-773-1

**© Ғафур Ғулом номидаги
нашриёт-матбаа ижодий
уйи, 2016**

ҒАЗАЛЛАР

* * *

Тушди савдои муҳаббат бошима,
Ор этар мардум келурға қошима.

Қўб муҳаббат қўйида қон йиғладим,
Етти иқлим ғарқ бўлди ёшима.

Сажда айлар зоҳид ул меҳроб аро,
Мен қилурман сажда эгма қошима.

Қил ҳазар, албатта, жонон, қаҳрдин,
Узру зорим сенга – бағри тошима.

Муҳтасиб тўктурди соқий бодасин,
Етмади ақли анинг сирдошима.

Кунда юз минг жабр қилсанг, ўргулай,
Қўй қараб ғам юкини бардошима.

Машраби девонани ҳайрон этиб,
Не сабабдин келмадинг бир қошима.

* * *

Мен нола қилай шому саҳар дод эшигингда,
Жонимни берай, шўхи паризод, эшигингда.

Ул лолаю райҳону суман, тоза қизил гул,
Чун сарв қадин букилди шамшод эшигингда.

Хўбони жаҳон бўлса тақи Юсуфи Канъон,
Султону амир, бандаю озод эшигингда.

Зулфунг сени бу жонима юз доми балодур,
Жоним қуши сайд ўлди чу сайёд эшигингда.

Олам бориси лаззати ҳуснунгни топибдур,
Гирёну фиғон, нолаю фарёд эшигингда.

Савдои муҳаббатга тушубман сени излаб,
Ўлдурди ғаминг, кўзлари жаллод, эшигингда.

Ашким тўқубон ҳажру ғамингда кеча-кундуз,
Вайрона ватан – манзили обод эшигингда.

Ул ҳусну жамолинг ўти Машрабға тушубдур,
Парвона сифат куйди паризод эшигингда.

* * *

Девонадурман шамъи шараржилва санамға,
Қурбон бўлай оташкадаи шуъла адамға.

Зебо санамим бода ичиб, юзини очиб,
Ўт қўйди паризод гулистонни эрамға.

Бир «ху» била мен Лайлини мажнун қилаёздим,
Девоналиғим шона урур зулфи санамға.

Юз жоним агар бўлса анга ҳеч аямасман,
Мен талпинибон жон берайин қоши қаламға.

Зоҳидки, агар ичса эди бодайи маъшук,
Сармаст бўлудон бормас эди Макка – ҳарамға!

Машраб, не балодур шикани туррайи кокул,
Барбод ўладур кишваридин ушбу ҳашамға.

* * *

Санам юзини кўрсатур ошиқи мубталосиға,
Ғами била ўлғон адо Мажнуни бенавосиға.

Толиби ишқ ўлай десанг ҳиммати Адҳами керак,
Зарра қачон етар, вале, васли санам аросиға.

Ёр юзини кўрай десанг, васли била бўлай десанг,
Ризо керак қазосиға, сабр керак балосиға.

Ўтти жаҳондин авлиё, муршиду ориф, анбиё,
Бўлмадилар фирифтаси дунёни можаросиға.

Восили Ҳақ бўлай десанг, ишқу муҳаббат ҳосил эт,
Ўрта ҳавою кибр уйин шамъи юзин зиёсиға.

Куйса муҳаббат ўтиға фиску фужур гуноҳларинг,
Хилват этиб келур ўзи кўнгулнинг хонақосиға.

Машраби бенаводурман, арзи дилимни айтайин,
Тараҳҳум айла, эй пари, ишқингни бу гадосиға.

* * *

Сенсан севарим, хоҳ инон, хоҳ инонма,
Қондур жигарим, хоҳ инон, хоҳ инонма.

Ғам шоми фироқингда кабоб этти фалакни,
Оҳи саҳарим, хоҳ инон, хоҳ инонма.

Ногаҳ сари зулфунг сори бўлдум сенга мойил,
Эй тожи сарим, хоҳ инон, хоҳ инонма.

Лаълинг ғамидин кўнглум эрур ғунча каби қон,
Гулбарги тарим, хоҳ инон, хоҳ инонма.

Заҳри ғами ҳажринг мени ўлдурғали етти,
Эй лаб шакарим, хоҳ инон, хоҳ инонма.

Машраб бўдубон кўйингта чун барқи тажалли,
Қолмай асарим, хоҳ инон, хоҳ инонма.

* * *

Арзимни айтай боди сабоға,
Биздин дуо деб ул дилрабоға.

Кўзлари Чўлпон, сарви хиромон,
Зулфи паришон, қоши қароға.

Қомати ларзон, ваъдаси ёлғон,
Турмади ҳаргиз аҳду вафоға.

Учди кўзимдин ул пари янглиғ,
Ташлади-кетди турлук балоға.

Шоҳи мукаррам, шоҳи муаззам,
Қилмади шафқат мендек гадоға.

Қилдук иковлон бир аҳду паймон,
Ҳар ким ёмондур солдук худоға.

Дарди фироқинг айлади бемор,
Қайда борайин эмди давоға.

Ҳажрингда тинмай қилдим фиғонлар,
Етти бу нолам арзу самоға.

Қилғил тараҳҳум, эй ёри хушхў,
Лойиқ эмасман жабру жафоға.

Дарду аламдин болу пар айлаб
Шахбоз кўнглум учди ҳавоға.

Йўл бермадилар менга рақиблар,
Чиқдим бош олиб бул Карбалоға.

Эй ёри бадахд, бемеҳр экансан,
Раҳм айламайсан мен мубталоға.

Дарду ғам ичра сарғайди юзум,
Ранг бергусидур ул кахрабоға.

Эй жонажоним, кўрсам жамолинг,
Жоним тасаддуқ сен хуш адоға.

Ишқингда куйдум, эй сарвинозим,
Бир марҳамат қил мен бенавоға.

Шавқингда жоним бўлди бараҳна,
Айб этмагин сен мен норасоға.

Юрдум йўлунгда мен кеча-кундуз,
Фарёд этибон йиғлаб худоға.

Бечора ҳайрон, бесару сомон,
Сувсаб қолибман бул Карбалоға.

Эй бағри тошим, ҳажрингда куйдум,
Топшурдим охир қодир худоға.

Дилхаста Машраб қилмасму фарёд,
Кўзлари жаллод олса ароға.

* * *

Кўнглумни бердим сен бевафоға,
Куйди юрагим жабру жафоға.

Эй нозаниним, раҳм айла манга,
Қолдим сени деб юз минг балоға.

Меҳнат чекарман роҳат кўрай деб,
Қилсанг жафолар йиғлай худоға.

Бемори ишқинг бўлдум нетарман,
Собир – балоға, рози – қазоға.

Мужгонинг ўқи ўтти юракдин,
Ногаҳ совуқ сўз тушди ароға.

Машраб, сени деб кечди жаҳондин,
Раҳм айламайсан муфлис гадоға.



Bu tanishuv parchasidir. Asarning to'liq versiyasi
<https://kitobxon.com/oz/asar/4601> saytida.

Бу танишув парчасидир. Асарнинг тўлиқ версияси
<https://kitobxon.com/uz/asar/4601> сайтида.

Это был ознакомительный отрывок. Полную
версию можно найти на сайте
<https://kitobxon.com/ru/asar/4601>